

**共同經課-1 使徒行傳二章一節～二十一節**

1 五旬節的期已經到，in 攏聚集佇一所在。2 忽然，對天有聲，親像大風啲吹，充滿 in 所坐歸間的厝，3 就有啲分開的舌出現互 in 看見，親像火的舌，歇佇逐人的頂面。4 in 攏受聖神充滿，才開嘴講別樣的腔口，是照聖神所賞賜 in 講的。5 彼時，有虔誠的猶太人對天下逐國來的，住佇耶路撒冷。6 此個聲一下起，眾人聚集紛紛亂亂，因為逐人聽見 in 照伊家己的土腔來講，就攏印愕；7 奇怪講：「你看，諸個啲講的豈無一概是加利利人嗎？8 怎樣咱聽 in 講照咱逐人所出世的土腔啊？9 咱諸個帕提亞人、米太人、以攔人，及惦佇米所波大米、猶太，及加帕多家、本都、及亞西亞、10 弗呂家，及旁非利亞、埃及，近倚古利奈的呂彼亞，諸個地方的人，以及對羅馬來的出外人，有的是猶太人，有的是入猶太教的人，11 革哩底人、亞拉伯人，攏聽 in 用咱的腔口，來講上帝的大事。」12 就攏印愕躊躇，相及講：「這甚麼意思？」13 亦有別人恥笑 in 講：「in 是飲新酒啲醉。」14 總是彼得及十一個使徒倚啲，大聲給 in 講：「猶太人及攏總倚起佇耶路撒冷的百姓啊，恁著知此個，亦著致意聽我的話。15 諸個人毋是酒醉；親像恁所拍算，因為此霎抵才頂晡九點鐘。16 這就是託先知約珥所講的，講：17 上帝講：佇路尾的時日，我欲用我的神降落佇凡有肉體的。恁的後生恁的查某子欲做先知講話；恁的少年人欲看見異象；恁的老人欲得著眠夢。18 佇許個日，我也欲用我的神降落佇我的奴僕奴婢，in 亦欲做先知來講。19 頂面佇天裡，我欲顯出奇事；下面佇地裡，我欲顯出神蹟；就是血，及火，及煙霧。20 日欲變做暗，月欲變做血；佇主大閣榮顯的日未到的代先。21 閣凡若求叫主的名的，會得著救。」

**共同經課-2 詩篇一零四篇二十四節～三十四節、三十五節 b**

24 耶和華啊，你所造的怎樣許多！攏是你用智慧造成的；遍地滿滿你的富有。25 遐有海，大閣闊；其中有算袂了的動物，大細的活物攏有。26 佇遐有船啲行，有所創造的大魚游來游去。27 諸個攏啲聽候你通照時互 in 食物。28 你互 in，in 就拾起來；你展開你的手，in 得著好物夠飽。29 你掩你的面，in 就掛慮；你將 in 的氣收回，in 就死無，來歸佇土粉。30 你發出你的神，in 就受創造；你互地面換做新。31 願耶和華的榮光永遠佇啲！願耶和華為著伊所造的來歡喜！32 伊看地，地就振動；伊摸山，山就出煙；33 我欲一世人向耶和華吟詩！我猶活的時，欲向我的上帝唱歌謳嘍！34 願伊掠我的靜靜想做合意！我欲因為耶和華歡喜！我的心神啊，著謳嘍耶和華！恁著謳嘍耶和華！

**共同經課-3 羅馬書八章二十二節～二十七節**

22 因為咱知一切受造的物到此時猶啲相及吐氣、苦痛。23 噯若按呢，就咱本身得著聖神頭水的果子的，也心內家己吐氣，啲聽候設立做子，就是咱的身軀的贖回。24 因為咱得救是對向望；若是已經看見的向望毋是向望，因為所看見的甚麼人啲向望伊？25 獨獨咱若向望彼個所無看見的，咱就吞悞聽候。26 閣聖神也親像按呢扶持咱的軟苳，因為咱毋知影著怎樣祈禱照所應該的，獨獨聖神家己用袂講出的吐氣替咱求。27 鑑察人的心的，也知聖神的意思，因為伊照上帝的意思來替聖徒求。

**共同經課-4 約翰福音十五章二十六節～二十七節、十六章四節 b～十五節**

26 若是保惠師就是真理的神對父出的，我對父欲差伊就近恁；伊若到，欲為著我做干證。27 恁亦欲做干證，因為恁對起頭及我佇啲。」4 我對起頭無給恁講諸個，是因為我及恁佇啲。5 今我去歸佇差我的，恁中間無人問我，講：『你欲叨落去？』6 干單為著我有給恁講諸個，恁已經滿心憂悶啦。7 若是我將實情給恁講，我去，是做恁的利益；我無去，保惠師無來就近恁；若去，就欲差伊就近恁。8 伊到，的確用罪、用義、用審判，來指正世間。9 用罪，因為 in 毋信靠我；10 用義，因為我歸佇父，恁無閣看見我；11 用審判，因為此世間的人君已經受審判。12 「我猶有多項欲給恁講，獨獨恁現今當袂起。13 到真理的神來，伊欲導恁入佇一切的真理；因為伊毋是欲憑家己來講，是將伊所欲聽見的來講，閣欲用啲欲來的事報恁。14 伊欲榮光我，因為伊欲對我所有的領受來報恁。15 凡若父所有的，攏是我的；所以我講，伊欲對我所有的領受來報恁。」